

王樸莊傷寒論註



卅補齋醫書後集七

傷寒論註目錄

傷寒論註六卷

卷一

太陽病用桂枝湯法

瘧附

太陽病用麻黃湯法

葛根湯附

太陽病用青龍湯法

太陽病用柴胡湯法

卷二

太陽病用承氣湯法

太陽病用陷胸湯法

太陽病雜療法

卷三

少陽病狀

少陽病狀

卷四

太陰病狀

少陰病狀

卷五

厥陰病狀

卷六

傷寒宜忌

發汗吐下後病狀

霍亂病狀

陰陽病已後勞復

卷
雜方

傷寒論附餘三卷

冬温

温瘧

風温

温毒

溼温

卷二

寒疫

壞病

傷寒例新注一卷

讀傷寒論心法一卷

迴瀾說一卷

時節氣候決病法一卷

傷寒論注卷四

吳縣王丙樸莊著

元和陸懋修九芝校

太陰病狀第一

八證方二首

太陰亦有中風無傷寒本篇藏寒病是噉生冷而傷脾
而陽者乃內傷非外感又在提綱外故但云屬太陰也

太陰之為病腹滿吐食不下自利益甚時腹自痛若下之必

胸下堅結

懋修案千金作食不下下之益甚時腹自痛胸下
又案醫宗金鑑據吳人駒說謂自利益甚

四字當在胸下堅結之下又
云腹滿下應先有自利二字

太陰病生於本本者溼土也寒風從鼻入腹故腹滿或足

十和及醫言
名曰
一
腑受之其經脈逆於腹中則腹亦滿也吐與嘔有別嘔者
有聲吐者有物寒氣逆上則吐而食不下寒氣注下則利
中陽愈陷則利益甚寒與正氣搏則時時作痛此爲病發
於陰間有溜於陽明而作熱者若誤下之亦必胸下痞堅
而成藏結也

太陰脈浮可發其汗宜桂枝湯

懋修案千金
無末四字

此溜於陽明者也病已從陽則吐利腹痛必不甚以桂枝
湯爲法而增減之可也

太陰中風四肢煩疼陽微陰濇而長爲欲愈

此風中腑臂自手太陰來者苟能溜於陽明四肢必見煩

疼逆邪仍還故道而出煩者熱也疼者邪也陽微陰濇是
太陰中風之常脈風在陰分也若於微濇中見有長意則
邪將自達矣所謂長則氣治也

太陰病欲解時從亥盡丑

張令韶曰太陰爲陰中之至陰陰極於亥陽生於子從亥
至丑陰盡而陽生也陰得生陽之氣故解

自利不渴者屬太陰其藏有寒故也當溫之宜四逆輩

自利便滑也與下利之不堪暢者不同藏指胃言

懋修案
胃當作

脾玩上文生冷
傷脾陽句可見

爲生冷所傷則亦屬太陰也此示太陰內

傷寒飲之治法成注自利而渴屬少陰爲寒在下焦自利

不渴屬太陰爲寒在中焦與四逆等湯以溫其藏

傷寒脈浮而緩手足溫是爲繫在太陰在太陰當發黃小便自利利者不能發黃至七八日雖煩暴利十餘行必自止所以自止者脾家實腐穢當去故也

發黃以上解見陽明篇七八日已過一經有從陽明之本燥而轉者則大便堅也有從陽明之表熱而轉者則煩而下利也煩而下利似乎變證然煩爲陽氣之復利爲陰邪之去因前此脾氣不運所停水穀已成腐穢今脾得陽明標熱而虛轉爲實利每一行腐穢盡去濁降而清升必有微汗不待言也

本太陽病醫反下之因腹滿時痛爲屬太陰桂枝加芍藥湯
主之其實痛加大黃湯主之

桂枝

生薑

各三兩

芍藥

六兩

炙草

二兩

大棗

十二枚

加大黃湯卽於前方中加大黃二兩

一作半兩

此太陽轉屬太陰也太陽病風將化熱誤下而陷內當以

桂枝加芍和之蓋腹中熱痛宜芍藥以芍性寒能通脾絡

也若大便實而痛則邪已歸於陽明可用大黃矣乃仍主

以桂枝湯者欲使邪從外解又太陰兩解表裏之法也

人無陽證脈弱其人續自便利設當行大黃芍藥者減之其

人胃氣實

懋修案千金作胃氣弱當從之

易動故也

無陽疑當作太陽承上條言脈之弱者不必誤下而已續
自便利卽有滯積當用大黃芍藥亦宜減之蓋卽許學士
溫脾湯一類證也誠以脾胃相通胃之氣變現於寸口胃
之虛實徵於大便脈弱便利胃氣之弱而胃家之虛可知
言此以結太陰治法不可不慎也

少陰病狀第二

四十五證方一十六首

經曰少陰之上君火主之又曰陰中之陰腎也本陽而
標陰其病從本從標變動不居少陰固但有中風其中
寒而病者東垣云少陰者藏也自鼻息而入是也喻嘉
言曰少陰水藏也水居北方原是坎止惟挾外邪而動

則波翻浪涌橫流逆射無所不到爲嘔爲欬爲利爲四肢沈重仲景不顧外邪惟以真武一法坐鎮北方之水水不橫逆則諸證自止而人之命根賴以攸固命根者何卽腎中一點真陽伏藏腎水中者水中火發所以證雖陰而反煩躁多汗似陽仲景每用薑附等以收攝其陽初不慮夫外感蓋陽旺則腠理大開外感先出所以一回陽而了無餘義也若用寒涼助水則真陽不返而命根斷矣必識此意然後知仲景溫經散邪之法細微曲折與九轉還丹不異也

少陰之爲病脈微細但欲寐也

懋修案于金無也字

辨脈法云脈警警如羹上肥者陽氣微也縈縈如蜘蛛絲者陽氣衰也蓋輕取則微重取則細本經之正氣極虛所以爲受邪之地也但欲寐者非嗜臥之謂乃或得寐或不得寐昏昏如夢擬其神情常似欲寐未寐之交耳此少陰爲病之始全從神識上見之

少陰病欲吐而不煩但欲寐五六日自利而渴者屬少陰虛故引水自救若小便白者少陰病形悉具其人小便白者下焦虛寒不能制溲故白也

首句少陰疑當作太陰言太陰病之屬少陰者也太陰腹滿卽當發吐若欲吐不吐則邪從中焦乘虛而入下焦不

能為風性之上越而轉為寒氣之下注由是腎氣獨沈不
交於心則煩衛氣行陰不通於陽則欲寐遂成少陰為病
之機至六七日太陰之一經盡遂作自利利亦太少病所
同而以渴別之是屬少陰也蓋津液下注而不上潤於舌
則引水自救愈利則愈渴愈渴則愈飲也至小便色白而
少陰裏寒之病形於此畢見矣小便之所以白者則以下
焦火衰失決瀆之職無以制洩之故治法必以溫理下焦
為主古用溫藥浸冷服為此等病設也

夫病其脈陰陽俱緊而反汗出為亡陽

懋修案千金翼方無亡字

屬少陰

法當咽痛而復吐利

懋修案千金連上作一條翼無一條不冠以少陰病三字故此條

又案千金

必不得
跳行

此內傷之寒屬少陰者也內經陰盛生內寒寒留則血凝
 血凝則脈不通其脈盛大以濇故中寒即此證也蓋先有
 內寒而外寒中之原其本不從少陰之為病而來故但曰
 病也脈陰陽俱緊即盛大以濇之謂反汗出者寒氣留則
 溫氣去無以固腠理也汗出而亡其衛之陽則病必屬之
 少陰矣

少陰病欬而下利譫語是為被火氣劫故也小便必難為強
 責少陰汗也

此言少陰病之火逆也小便難非徒不利之謂蓋有點滴

亦不易出之意喻嘉言曰以火劫汗則熱邪挾火力上攻
必欬下攻必利內攻必譫語三證皆妨小便故小便難蓋
肺爲火氣所傷則膀胱氣化不行大腸奔迫無度則水穀
併趨一路心包燔灼不已則小腸必致枯涸少陰可強責
其汗乎

少陰病脈細沈數病在裏不可發其汗無陽故也陽已虛尺
中弱濇者復不可下之

懋修案千金有少陰病脈微不可發其汗下接無陽故也另爲一條

此手少陰病之生於本者也其始脈微細繼從君火變爲
細沈數所謂躁者在手當以小承氣和其胃不可以麻黃
附子甘草發其汗爲其津液之素虛也然必審其尺中之

沈候細而有力兼滑者可下若弱而無力濇而少氣但當以黃連解毒湯和之不可下也

少陰病脈緊者至七八日下利其脈暴微手足反溫其脈緊反去此爲欲解雖煩下利必自愈

此下七節言少陰愈證也少陰病有始脈微細續見緊者蓋從兩腑得之循經入裏正與邪爭知其過此一經而少陰君火之氣必能交出太陰自然下利而脈見暴微邪可出矣所恐利似厥陰耳若手足反溫脈緊反去是君火有權雖以裏陰未復而煩必自愈也

少陰病下利若利止惡寒而蹇手足溫者可治

少陰下利有燥有溼溼與寒相得而利非急温不止其自
止者必兼燥也少陰受寒水之氣與其人本體之燥兩不
相得下注爲利燥若尼之利亦無多是名下利非若自利
之直瀉也亦有液以利亡無可下注而自止者非吉兆也
若利止後陽氣未復則必惡寒而蹇有此跼蹐之狀寒既
傷陽利復傷陰恐寒與燥固結而變厥逆雖四逆等亦難
決效故必手足能温而始可治也

少陰病惡寒而蹇時自煩欲去其衣被可治

懋修案千金作不可治恐誤

少陰惡寒病爲在裏蹇則幾入藏矣蓋少陰脈由足入
腹屬腎蹇則邪將內入若不蹇而煩欲去衣被是少陰之

樞未壞而君火之氣欲伸尙可助陽以達邪也

少陰中風其脈陽微陰浮爲欲愈

重在陰浮二字蓋少陰脈微細以尺寸例之必陽微陰細與太陽篇脈浮弱用桂枝湯語氣相同若陰本細而轉爲浮則邪從陰中而出矣故知爲欲愈

少陰病欲解時從子盡寅

成注陽生於子子爲一陽丑爲二陽寅爲三陽解於此者陰得陽則解也

少陰病八九日而一身手足盡熱熱在膀胱必便血

凡少陰病所以溜於府者腎脈本絡膀胱兩相通也若脈

至絡膀胱處不出太陽之經則不能為太陽病但停留於
絡至八九日寒化熱而向外先於身次及手足以太陽主
表故盡熱也必便血者與太陽篇熱結膀胱血自下下者
愈同義

少陰病其人吐利手足不逆反發熱不死脈不足一作者灸

其少陰七壯

吐利皆寒邪也腎中真陽失守則陽氣隨吐利而散真陽
未動則寒邪從吐利以出但使手足不逆身反發熱是陽
氣未離表治之可生也脈不足者吐利驟虛之故灸太谿穴
少以引陽內返則生機復矣

世補腎膏

少陰病狀

少陰病但厥無汗強發之必動血未知從何道出或從口鼻
或從目出是爲下厥上竭爲難治

此四逆散證也但厥者不吐下煩躁乃寒氣與燥氣相結
邪不得達當緩調之使少陰之樞自轉若誤發汗血必逆
其行而上出於陽竅以其人津液少也喻嘉言曰下厥者不
得汗而熱深也上竭者血從上而越竭也少陰本少血且
從上逆故難治愚謂凡云難治非不可治也特需之時日
耳卽如此條已轉入厥陰病機殊費消息用藥迭有權衡
難定一主方者也

少陰病惡寒踈而利手足逆者不治

此下五節皆言少陰死證也凡三陽與太陰除一誤再誤外無死證少陰則有蹉跎數日卽不治者不可執不服藥爲中醫之說也此條純是有陰無陽程郊倩曰使早知助陽而消陰何至此乎

少陰病其人吐利躁逆者死

煩者志之亂躁者氣之亂煩躁者神之亂也程郊倩曰由吐利而躁煩陰陽脫離擾亂可知加以四逆胃陽絕矣不
死何待使早溫中而煖土何至於此
少陰病下利止而頭眩時時自冒者死

此臂受寒風傷手少陰而爲病也手少陰心不受邪移之

小腸則下利便膿血若利止而時時自冒邪仍陷於心藏
矣使早用石脂白粉等法甯至此乎

少陰病四逆惡寒而蹇其脈不至其人不煩而躁者死

程郊倩曰諸陰邪具見而脈又不至陽先絕矣不煩而躁
陰亦同盡可知使早知復脈而通陽甯至此乎

少陰病六七日其人息高者死

此少陰失下證也凡人一呼一吸爲一息金匱云吸而微
數其病在中焦實也當下之則愈言中焦實則吸不得入
還出復入故息微數今少陰病無吐利等證是君火病而
火土同實也不急下之至六七日息之吸者不入而但行

於胸則氣專向上而爲息高下之死不下亦死矣使早用承氣及河間解毒法甯至此乎

少陰病脈微細沈但欲臥汗出不煩自欲吐至五六日自利復煩躁不得臥寐者死

少陰病本脈微細加以沈候得之宜急溫矣且但欲臥則比欲寐爲尤甚陰不得有汗則汗出爲亡陽不煩則無熱自欲吐則中上皆虛寒生氣已是索然況至五六日而自利煩躁不得臥復不得寐喻氏謂眞陽擾亂頃刻奔散能不主以死乎按此本附子湯證稍一失治到四五日急灸百會關元繼以大劑參附或者可教程郊倩曰以今時之

弊論之病不至惡寒身踈四肢逆冷等證疊見則不敢溫
嗟乎證已到此溫之何及況此諸證有至死不一見者曷
不於本論中要旨一審詳之少陰病脈必沈而微細論首
揭此已示人以可溫之脈矣少陰病但欲寐論首揭此已
示人以可溫之證矣汗出在陽經不可溫在少陰宜急溫
論又示人以亡陽之故矣況口中和不煩自欲吐少陰中
之真證不過如此此時邪僅在少陰之經未遽入藏而成
死證也然堅冰之至履霜而知則真武四逆誠不啻三年
之艾矣乃延至五六日而邪遂入藏前欲吐今且利矣前
不煩今煩且躁矣前欲臥今不得臥矣陽虛已脫陰盛轉

加其人死矣醫尙不知何病或曰陽證見陰脈宜死或曰陰陽兩感不治或曰傳經熱邪失下而成不治之壞病倘有人語以少陰失溫且閔然曰其手足不厥冷不惡寒蹇臥而且煩躁如是不臥如是何陰虛之有噫嘻吾見其人矣吾聞其語矣因悟仲景一片婆心蓋不啻輿尸以諫也少陰病始得之反發熱脈反沈者麻黃細辛附子湯主之

麻黃

細辛

各二兩

附子

一枚炮

右以水二斗先煮麻黃去上沫內諸藥煮取三升去滓溫服一升

此少陰之始可汗者也陰病豈驟能發熱反發熱而不頭

痛知非溜於太陽而生於君火之本也火爲病脈當浮大以鬱於其經故反沈不急發之使溜於太陽而外解二三日必口燥咽乾矣附子以溫裏之經麻黃以洩表之衛邪出而真陽不傷是少陰表法附子用炮者欲其守於內而蒸動陰液以爲汗非徒開其腠理也細辛幽香能宣君火又入少陰之經而搜留伏之風寒也

少陰病得之二三日麻黃附子甘草湯微發汗以二三日無證故微發汗

麻黃

去節

炙草

各二兩

附子

一枚炮

右以水七升先煮麻黃一二沸去上沫內諸藥煮取二升

半去滓温服八合

此無發熱而亦以麻附取汗者病自外來必達外爲解也
用甘草者附得甘而温及中焦以防其吐利麻得甘而緩
其表散但微微作汗然惟二三日無吐利裏證者始可用
之若有吐利麻黃非所宜矣

少陰病得之二三日以上心中煩不得臥者黃連阿膠湯主
之

黃連

四兩

黃芩

一兩

芍藥

二兩

雞子黃

二枚

阿膠

三挺

右以水六升先煮三味取二升去滓內膠烺盡內雞子黃
攪令相得温服七合日三服

此病生於君火者二三日以上便鬱極而煩愈欲寐而愈
不得寐治之以連芩清其熱芍藥斂其榮妙在用阿膠雞
子黃之濡潤而行血脈者佐之使少陰之陰氣周流於經
脈中則血行而邪自解也

少陰病得之一二日口中和其背惡寒者當灸之附子湯主
之

此病生於少陰之標者少陰從本從標其機必先見於舌
燥者為火得之一二日而口中和則非君火為病矣懋修案自

公以後能知少陰為君火者尚有何人背惡寒是太陽衰當灸太陽陷下之

穴而以附子湯補其裏不可緩也緩則變五六日自利煩

躁不治之證

少陰病身體痛手足寒骨節痛脈沈者附子湯主之

此太陽之表寒一起即轉入少陰者也身痛手足寒原屬
太陽但不頭痛而骨節痛則入少陰矣此脈所以沈也非
陰陽兩虛不至此急温而補之正勝則邪卻矣

附子

二枚炮

茯苓

芍藥

各三兩

人參

三兩

白朮

四兩

右以水八升煮取三升去滓温分三服

懋修案干金作分温服之

湯名附子專重此一味故用至加倍蓋邪自表來本虛

者急補裏以禦之此善守之法佐之以參陰陽相配也

懋修案於此可見樸老亦以參為補陰而陳修園之說益可信矣

寒必傷榮以芍合參

而榮和寒必挾溼以苓朮協附而溼通不動聲色而措之磐石之安此方是也

少陰病下利便膿血桃花湯主之

此手少陰爲病也心移寒於小腸故下利難經云小腸泄者溲而便膿血少腹痛是也桃花湯升陽散火也

少陰病二三日至四五日腹痛小便不利下利不止而便膿血桃花湯主之

與上條同此於二三日至四五日以漸而來由少陰之標寒轉爲君火之本熱至便膿血而小腸之證見矣舍桃花無他法也

赤石脂

一斤以半爲末一半完

乾薑

一兩

粳米一升

右以水七升煮米熟湯成去滓温取七合內赤石脂末一

方寸匕一服愈止後服

懋修案千金作一服止餘勿服

赤石脂色赤入心人知其濇而不知其善於散結讀本草自明此能速至下焦藉乾薑以劫其本寒而散之復和以粳米使石脂之散末留連於胃以行徹上徹下之法則心與小腸竝通而利卽止矣一服愈止後服爲挾燥者言之恐黏滯腸間作熱也

少陰病下利便膿血者可刺

言旣服桃花湯亦可刺也柯韻伯曰此亦熱入血室所致

宜刺期門以瀉之病在少陰而刺厥陰實則瀉其子也愚
謂刺期門可得汗亦升陽散火之意

少陰病吐利手足逆煩躁欲死者吳茱萸湯主之

方見陽明門

此少陰中寒從鼻而入者也三陰齊受必以少陰爲樞故
曰少陰病凡少陰煩躁者死爲其神亂寒已入藏也此云
煩躁欲死者躁雖甚而神未失故以吳茱萸湯專救三焦
之元氣不但溫經散寒而已也

少陰病下利咽痛胸滿心煩豬膚湯主之

手少陰病既下利矣乃不便膿血而咽痛者邪不專入小
腸仍屬本經之因寒化熱也手少陰脈挾咽故咽痛熱鬱

於上故胸滿心煩主以豬膚湯止利而清熱且以鬆胸前之腠理也

豬膚一斤

石以水一斗煮取五升去滓內白蜜一升白粉五合熬香和令相得溫分六服

豬爲水畜可制心陽之亢又埴壚用豕知其必開腠理而鬆肌表膚卽豬皮更能引出於膚也白粉卽鉛粉湯液本草注乃云豬膚湯中非此粉是白米粉謬矣本論竝無米字非米可知海藏必疑本方白粉五合爲多故認爲米粉耳意五合字必有訛

少陰病二三日咽痛者可與甘草湯不差可與桔梗湯

甘草

二兩

加桔梗一兩卽名桔梗湯

右以水三升煮取一升半去滓溫服七合日再服

此手少陰病之輕者二三日不利惟咽痛是心火鬱熱不移小腸而燥肺也生甘草通經脈利血氣用以瀉心火而保肺金二藏調和則手少陰之氣自交出於手太陰矣不差則肺中已有熱結加桔梗以開肺而宣結則必差也兩言可與有隨機加味之意

少陰病咽中傷生瘡不能語言聲不出苦酒湯主之

雞子

一枚去黃內好上苦酒於殼中

半夏

洗破如棗核十四枚

右納半夏置苦酒中以雞子殼置刀環中安火上令三沸去滓少少含咽之不差更作三劑愈

此足少陰病也凡咽痛屬手少陰從本不可溫屬足少陰從標必當溫咽中尤其明證也靈樞云會厭者音聲之戶在咽中足少陰爲寒所傷其經脈盡處結澀不通痰涎附麗於此尸蟲上蝕傷而生瘡則不能語言聲不出矣凡遇此證望其咽喉正中處必有黏痰乃頰頰不開之故蓋清氣不通於鼻故濁凝而下結也治法以半夏之辛微取其氣使上行以通頰頰之竅合苦酒之酸泄以掃痰涎而解毒更以雞子白之潤肺而清氣分之熱者和之繆仲醇曰

苦酒湯到咽卽效余亦歷試皆驗有服此而口中發出穢
氣至不可近而咽爛已愈者

懋修案三尸或稱三彭上尸彭琚住泥丸宮中尸彭質
住臚中下尸彭矯住臍下丹田三尸喜人爲惡不喜人
爲善修鍊家必斬三尸而後得道然守庚申者且不能
斬也三尸名神亦名蟲治以殺蟲藥兼補氣血又案
此繆仲醇數語必須著眼

少陰病咽中痛半夏散及湯主之

半夏

桂枝

炙草

等分

已上三味異擣合治白飲和服方寸七日三服不能散服

者以水一升內散兩方寸匕煮令小冷少少含嚥之

懋修案干

金嚥之下有半夏有毒不當散服八字

龐安常曰非時有暴寒中人毒氣伏少陰經始雖不病旬

日乃發脈微弱法先咽痛次下利咽痛半夏桂枝甘草湯

主之下利通脈四逆湯主之此病二三日便差古謂之腎

傷寒本經半夏治咽喉腫痛以能通顏頰而豁痰涎也合

桂甘以散其經中之寒則愈矣

少陰病下利白通湯主之

附子

一兩生用

乾薑

一兩

蔥白

四莖

右以水三升煮取一升去滓分温再服

此下六節言少陰下利治各不同也利外無陽證純乎寒
矣邪陷於下急宜溫通若用四逆恐甘草留戀上中不能
達下故附取其生薑取其少又以蔥白之辛寒而潤者爲
薑附向導下行而復向上則陰邪從而出矣

少陰病下利脈微服白通湯利不止厥逆無脈乾煩者白通
加豬膽汁湯主之

豬膽汁一合人尿五合

右二味內前湯中利令相得溫分再服若無膽亦可用服
湯脈暴出者死微續者生

下利脈微陽氣已衰服白通利仍不止陰亦傷矣所以厥

逆無脈乾嘔煩也此因藥不下達之故舍白通亦無他法
但加豬膽人尿之捷於走下者導之使入下焦以協力祛
寒邪乃出矣然服湯後脈暴出則陰涸而孤陽無依故死
脈微續則陰猶能戀其陽故生也

少陰病二三日不已至四五日腹痛小便不利四肢沈重疼
痛而利此爲有水氣其人或欬或小便自利或下利或嘔眞
武湯主之

二三日至四五日腹痛小便不利與桃花證同彼從本而
病及小腸此從標而病及胃內經腎者胃之關也關門不
利故聚水而從其類寒水之氣入於胃則應於四肢沈重

者溼也疼痛者寒也水蓄久而利少陰之水氣作利也眞武者北方司水之神使水歸其宅者也水性潤下逆則蛟龍乘之以翻波鼓浪爲泮洞之患故用三白以鎮於中苓滲之苟斂之朮運之加薑附以助坎中之一陽而流動下行水氣得之從膀胱而解矣蓋大小青龍升水氣以爲汗眞武則導水氣以爲溺也

日玩二三日不已句知少陰之脈微細但欲寐只在初起時過此一二日別現病象如咽痛吐利決不止但欲寐者而脈亦變矣故論中凡云某經病皆從初發病之本而言其併病或轉屬者必申言之彰明較著如此少陰篇從無彙入傷寒一條者注家多分直

中傳經兩項強釋此篇謬種流傳古意寢失矣

茯苓

芍藥

生薑

各三兩

白朮

二兩

附子

一枚炮

右以水八升煮取三升去滓温服七合欬者加五味子半升細辛乾薑各一兩小便自利者去茯苓下利者去芍加乾薑二兩嘔者去附子加生薑足前為半斤利不止便膿血者宜桃花湯

欬者水寒射肺病涉上焦加乾薑五味細辛兼小青龍法也小便自利去苓者水循故道則專散寒也下利必有寒積去芍之斂以乾薑之辛開之嘔為陽明氣逆故去附子加足生薑以宣之若利不止便膿血是水氣去

而病及小腸又當別用桃花湯矣

少陰病下利清穀裏寒外熱手足厥逆脈微欲絕身反不惡寒其人面赤或腹痛或乾嘔或咽痛或利止而脈不出通脈四逆湯主之

炙草

二兩

附子

大者一枚不炮

乾薑

三兩強人可四兩

右以水三升煮取一升二合分溫再服脈即出者愈面赤者加蔥白九莖腹痛去蔥加芍藥二兩嘔加生薑二兩咽痛去芍加桔梗一兩利止脈不出者去桔梗加人參二兩病皆與方相應者乃可加減服之

此寒風中於脰臂手足少陰齊病也手足少陰見病則下利

足少陰見病則清穀上火下水脈不相通從本從標各自
爲病裏寒者腎也故手足厥逆脈微欲絕也表熱者心也
故身反不惡寒面色赤也用四逆湯守中從黃婆媒合心
腎之道獨任乾薑裏寒爲重也火既生土然後用蔥白通
心陽以下行通腎陽以上行本方無蔥白蓋脫簡也腹痛
者脾絡急結也不宜蔥散當以芍藥通之嘔者胃逆也加
生薑以宣之咽痛者火鬱也不宜芍斂當以桔梗開之利
止脈不出者虛也去桔梗之洩肺而加人參以復脈則肺
陰自和也病與方應乃可加減用之言方法中加減具有
至理非可率意而爲之也

少陰病四逆其人或欬或悸或小便不利或腹中痛或泄利
下重四逆散主之

炙草

枳實

柴胡

芍藥

各十分

右搗爲散白飲和服方寸匕日三服欬者加五味子乾薑
各五分兼主利悸者加桂枝五分小便不利者加茯苓五
分腹中痛者加附子一枚炮泄利下重者先以水五升煮
薤白三升去滓以散三方寸匕內湯中煮取一升半分溫
再服

此因風中臂胛君火不及寒水侮之致成四逆也手冷過
肘足冷過膝少陰病多有之如兼見欬悸等證則君火內

鬱非有以達之不可夫少陰本交太陰太陰爲開今反逆而歸於厥陰之闔火鬱之極必變動不居故以灸草先緩其火卽以枳實開太陰以迎少陰而爲前導柴胡芍藥又以鼓動厥陰之中氣而不專於闔則少陰之樞自轉矣欬爲寒鬱於肺五味收陰乾薑散寒又君火從治法故兼主利也桂枝以通心陽茯苓以滲水溼炮附以溫脾絡薤白溫潤而升所以治下重也

少陰病下利

懋修案干金作不利

六七日咳而嘔渴心煩不得眠豬苓

湯主之

方見陽明門

心移熱於小腸而下利至六七日火復炎上而欬繼以嘔

渴心煩不眠知必兼有水氣用豬苓湯以導之入小腸而
出膀胱則少陰之火降而水道通利自止矣

少陰病得之二三日口燥咽乾急下之宜承氣湯

君火甫爲寒鬱而心陽已亢平素之土燥可知口燥咽乾
是滿口無津直乾至咽卽得之二三日便當急下緩則枯
槁難回矣承氣有大小二方隨時斟酌而用之

少陰病自利清水色青者心下必痛口乾燥者可下之宜大

承氣湯

一作大柴胡湯懋
修案此千金原注

經言諸病所出水液澄澈清冷爲寒暴注下迫爲熱今二
者兼之其利者寒也所以利者君火也面色純青則陷入

厥陰而見風木之色厥陰病當氣上撞心中疼熱此因
氣從利泄而不上撞知必疼在心下是當用大柴胡法者
若口乾燥君火亢極可大承氣矣

少陰病六七日腹滿不大便者急下之宜承氣湯

少陰六七日無陰證而現腹滿不大便即屬標病尚宜急
下況土燥水涸有甚於此者乎以大承氣下之一了而百
當矣

少陰病其脈沈者當溫之宜四逆湯

少陰病初起脈細者正邪湊於虛之會沈則在裏矣裏指
陰經脈所行軀殼之裏也四逆湯溫經以散寒也

少陰病其人飲食入則吐心中温温欲吐復不能吐若得之

懋修案千金作始得之

手足寒脈弦遲此胸中寒

懋修案千金作胸中實

不可下

也當遂吐之若膈上有寒飲乾嘔者不可吐當温之宜四逆

湯

風寒從鼻入故不能納飲食而不飲食時卻欲吐而不吐

問其手足則寒診其脈則弦遲此必中陽未衰驟為寒氣

所鬱者重在始得之三字然胸中雖實不可下也當乘勢

吐之以達其陽若素有寒飲在膈則飲食入口反不吐而

不飲食時又乾嘔倘用吐法必更傷其上焦之陽故宜四

逆湯守其中而温以通之

少陰病下利脈微瀋者卽嘔汗者必數更衣反少當溫其上

灸之

一云灸厥陰五十壯

此言少陰下利有素虛而非挾熱者平脈法云寸口脈微而瀋微者衛氣衰瀋者榮氣不足嘔而汗出中上之陽衰甚所以數更衣而反少病如滯下者不可謂是心經之挾熱也沈堯峰曰此陽氣下陷證溫上灸百會穴也在頭頂陷中卽內經陷者舉之之義

淵中暗內

蘇山將裝紳曰此則原平

其似以雙更交商又少

而齋齋香滿康竟

此言少劍平

六二

劍平門下晚學生馮汝玖校字

傷寒論注卷五

吳縣王 丙樸莊著

元和陸懋修九芝校

厥陰病狀第三

五十六證方七首

厥陰病從臂胛中風而來無自鼻入者鼻入則少陰矣
上五節是論厥陰之卽病者下皆溫暑之傷寒以病非
藏於裏之極深處卽陷於下之極窮處其間轉移出入
之機與厥陰之陰盡生陽相近故比類而附之全不關
於厥陰之經脈也

厥陰之爲病消渴氣上撞心中疼熱飢而不欲食甚者則欲

吐虵下之不肯止

一本作氣上撞心心中疼熱又下之下有則利二字

經言兩陰交盡名曰厥陰東方生氣胚胎於此厥陰為標

風木為本木中藏火不鬱則不現人身厥陰為闔今以寒

風鬱其經脈而闔者愈闔風動生火是以厥陰為病之始

未有不從相火而化者火旺則隨飲隨渴實能容水故謂

之消渴凡厥陰病以消渴為主猶太陰病以腹滿為主尤

綱中之綱也氣上撞心者手厥陰心包之氣亦相應而闔

於膈心氣不舒故疼而熱也飢者風之擾不欲食者木鬱

胃中也蟲為風化風自內動則生虵而從口吐出也病發

厥陰而反下之則風邪下陷而利不止矣

厥陰中風其脈微浮爲欲愈不浮爲未愈

脈浮是從陰出陽故欲愈不浮則未愈知厥陰中風之病

未有不見沈脈者也

厥陰病欲解時從丑盡卯

丑時氣血注於肝寅卯則木旺時也故解

厥陰病渴欲飲水者少少與水飲之即愈

厥陰病本消渴喜湯今寒從火化而欲飲水陰已轉陽矣

少與之令水火相濟胃氣和即愈也厥陰篇只此四條大

旨已全提出蓋誤下不可早清亦不可總求胃氣之和以

化相火之燥俟氣機之自轉而脈漸微浮乃可愈也此厥

陰中風之治法晉阮河南云得病熱者便以青箱苦參艾苦酒療之無不解者意即指此厥陰病耶
諸四逆厥者不可下之虛家亦然

此言諸經病之四逆厥者皆可入厥陰例以有陰極之象也凡即病之寒從外人者仍須外解為順下之為逆四逆散主之虛家者諸陽虛之證龐安常曰凡厥通用四逆湯謂脈浮遲或細或微或沈皆屬裏有寒也蓋不可下者其常下文言厥應下者乃溫暑之變耳

傷寒先厥後發熱而利者必止見厥復利

一本必字下有自字

此下論厥利嘔噦乃溫暑之傷寒有陽極似陰者有獨陰

無陽者有由陰轉陽者與厥陰居兩陰交盡處體陰用陽之變動相似故翼本目錄於此篇注云厥利嘔噦附也古入質厚能藏寒毒於肌膚至春夏變爲溫暑乃有此厥利之進退今人體虛遇感卽發伏寒本少況此等厥利又溫暑中僅有之變證一經誤治如行獨木橋三指輕推便已墮水卽應有熱六日厥反九日等證不及現矣諸家隨文敷衍蒙混千年今試略陳顛末經言熱病三日可汗三日後可泄皆是刺法所謂各通其藏脈也後人代以湯藥分別汗下法久弊生釀成神丹甘遂之技故仲景論中指出各經方治井井有條然病變無窮乃有一起卽厥至四

五日者亦有熱後厥至九日者此等證不便分屬別經故於厥陰篇中專論之謂傷寒病厥利相因利者下利非自利也蓋厥爲邪併於裏邪無從出必爲下利熱則邪達於表故發熱則利必自止見厥復利明是相因而致非純陰之厥可知

傷寒始發熱六日厥反九日而下利厥利當不能食今反能食恐爲除中食之黍一作索餅不發熱者知胃氣尙在必愈恐

暴熱來出而復去也後三日脈之其熱續在期之旦日夜半愈所以然者本發熱六日厥反九日復發熱三日并前六日亦爲九日與厥相應故期之旦日夜半愈後三日脈之數其

熱不罷此為熱氣有餘必發癰膿

懋修案今人於傷寒溫熱病愈後每有生癰生瘡者

此言極驗

溫暑病發熱初起便宜青龍失治則昏昏默默

懋修案此句不可從

有病在三焦界乎半表半裏者此條發熱六日復轉入半

裏而厥厥則必利利亦三焦之火從下注也厥而且利最

慮入陰即能食亦慮除中除中者胃氣革除中空易納求

食反急也黍米久食令人熱煩除中者得之必即發熱以

能助胃陽外浮也厥利初起時試之知胃陽在必愈及九

日後發熱尚恐來暴或去而仍陷陰分必第三日熱厥之

期相應始可愈也若脈反浮數其熱不罷即平脈法數脈

不時則生惡瘡之謂凡內癰皆是

傷寒脈遲六七日而反與黃芩湯徹其熱脈遲爲寒與黃芩湯復除其熱腹中冷當不能食今反能食此爲除中必死

脈遲爲寒指水飲言辨脈法云遲至六七日不欲食此爲晚發水停故也爲未解食自可者爲欲解晚發者自三月至夏末病傷寒也以停飲而晚發是寒水之氣久蓄於內溼蒸爲熱至六七日而脈仍遲方慮胃氣之弱不可遽徹其熱而誤以爲春夏之時氣與黃芩湯則不欲食者當益不能食矣若反能食是除中也除中則厥利而死可知以此推之凡用寒涼而致加煩渴及衄與汗者皆藥之誤不

可不慎也

懋修案若反能食則因乎腹中之冷中陽已盡是除中也

傷寒先厥後發熱下利必自止而反汗出咽中強痛其喉爲痺發熱無汗而利必自止便膿血便膿血者其喉不痺

厥與發熱只一鬱熱之氣出入所致其先厥而後熱者必熱厥相應而後汗乃爲愈徵若甫發熱而反汗出是三焦相火因鬱上炎必致咽痛而發喉痺蓋上焦本出胃上口並咽以上也若發熱無汗則熱移下焦因下利之勢爲便膿血而火不炎於上焦矣此與上條發癰膿同例當治以千金漏蘆湯

傷寒一二日至四五日厥者必發熱前厥者後必熱厥深熱

亦深厥微熱亦微懋修案此二句世厥應下之而反發其汗者口傷爛赤竟無人知之者矣

此言傷寒之先厥後熱者日數之多寡雖不等而發熱則總可必也蓋春夏之病若全不似暍溼則非新感之邪而爲久鬱之寒可知既不見太陽經脈證又不見六經相傳證知其熱必在三焦之半表裏而一入必一出故前厥者後必熱也厥有深淺微甚之不同亦必與熱相應當厥深時便知熱深應用大柴胡下之若反發其汗則辛溫之品直走陽明立見口傷而爛赤故戒之凡厥者陰陽氣不相順接便爲厥厥者手足逆者是

此申言厥之故也蓋太陽交於厥陰爲陰陽氣相順接之始今少陽三焦樞因陽明之闔而不得通則太陽不能承陽明之氣而開達於厥陰可知三陽俱不通三陰又何由而順接哉成注手三陰三陽接於手十指足三陰三陽接於足十指陽氣內陷不與陰接故手足厥冷也

傷寒病厥五日熱亦五日設六日當復厥不厥自愈厥不過五日以熱五日故知自愈

厥熱相應而復厥者氣猶未得其平也陽明居中土數五故厥終以五日爲常厥熱得平則陽明之氣已和而陰陽相順接矣上條厥熱逾五日之數故發癰膿

傷寒脈微而厥至七八日膚冷其人躁無安時此為藏結死

一作藏厥懋修案千金作此為藏寒虵上入其膈與下條併為一條

藏指胃言微即平脈法所云毛為肺脈也厥為三焦鬱而

反得肺金收瀉之象木氣之不伸可知所以厥至七八日

不但四逆而周身之膚俱冷明是相火陷入胃中燔灼糟

粕煉成燥屎不能傳送幽門宜其躁無安時也此於初厥

時頻進涼膈散等或可十全一二耳

虵厥者其人當吐虵令病者靜而復時煩此為藏寒虵上入

其膈故煩須臾復止得食而嘔又煩者虵聞食臭必出其人

常自吐虵虵厥者烏梅丸主之又主久利

此言虬厥不宜下也藏寒胃寒也胃寒必兼肝熱則飢不欲食而虬動故虬厥爲寒熱錯雜所致此厥陰中風之但吐虬而不厥者與傷寒後之虬厥皆可主以烏梅丸也戴元禮云胃冷必吐虬人皆知爲陰證然亦有陽證吐虬者蓋胃中無穀氣故虬上求食而吐須看別證何如不可專以胃冷爲說曾治一陽黃吐虬大發斑毒以冷劑取效是亦有陽證矣

烏梅

三百枚

乾薑

十兩

黃連

十六兩

當歸

四兩

蜀椒

四兩

細辛

附子

炮

桂枝

人參

黃蘗

各六兩

右以苦酒浸烏梅一宿去核蒸之五升米下搗如泥和諸

藥令相得曰中與蜜杵千下丸如桐子大先食飲服十丸
日三服少少加至二十丸禁生冷滑物臭食等

內經曰必伏其所主而先其所因病在厥陰以酸爲瀉
辛爲補君烏梅之大酸伏其所主也佐以椒桂薑附先
其所因也因於風寒也肝欲散細辛當歸以散之肝有
熱黃蘗以清之柯氏曰寒熱並用氣味不和故佐以人
參調其中氣以苦酒漬烏梅同氣相求也蒸之米下資
其穀氣也少與漸加緩以治其本也虺得酸則靜得辛
則伏得苦則下殺蟲之方無出其右者久利則虛調其
寒熱扶其正氣其利自止

傷寒熱少厥微指頭寒默默不能食煩躁數日小便利色白

者熱除也欲得食其病為愈若厥而嘔胸腹煩滿懋修案千金作胸脇

煩其後必便血指一作稍

此言厥微者不宜下也熱厥並見而微熱之淺者屬上焦

難經云上焦在胃上口主內而不主出其治在膈中不食

煩躁膈中病也許學士云膈中血聚則小腸壅宜用海蛤

散小便血行則愈此為血結胸婦人多有之愚按男子亦

常有此證小便利而白小腸不壅矣欲得食膈中之氣治

矣若厥時又見嘔與胸膈煩滿則上焦之熱漸移於中下

二焦而血聚膈中者從便而解矣

士有醫書
厥陰病狀

病者手足厥冷言我不結胸少腹滿按之痛此冷結在膀胱
關元也

此言陰結膀胱之厥不宜下也厥屬上焦慮臆中血聚今
問之而不結胸是病在下焦故少腹滿而按之痛關元詳
太陽篇血室注言膀胱又言關元者以冷結在膀胱血分
也宜溫通下焦血絡爲主

傷寒發熱四日厥反三日復發熱四日厥少熱多其病當愈
四日至六七日熱不除必清膿血

此與下節言厥熱之多少以定病之愈不愈也清與圍同
脈經云清者廁也

傷寒厥四日熱反三日復厥五日其病爲進寒多熱少陽氣退故爲進也

三焦之氣至而伸者爲陽反而屈者爲陰其實卽一氣之出入也以其病之陰疑於陽也故列於厥陰

傷寒六七日其脈數

一作微

手足厥煩躁灸厥陰厥不還者死

此下四節言厥有死證也凡傷寒初起卽昏昏默默不顯太陽經脈病者總以青龍爲主方故真人云凡療傷寒不出此也蓋不引之達於太陽則邪熱瀰漫三焦必轉厥陰脈數者轉手厥陰外寒內熱陰陽之氣何由而順接哉急灸厥陰提邪外出若厥不還入肝必死

傷寒發熱下利厥逆躁不能卧者死

此厥陰之邪由太陽而逆傳陽明也蓋發熱下利邪已向裏厥逆爲太陽不開躁不得卧則入陽明之府矣胃陰被劫故主死也

傷寒發熱下利至甚厥不止者死

下利至甚則有滑脫之虞加以厥不止邪無外達之機必陰涸而陷於藏圖之於早當歸四逆證也

傷寒六七日不利便發熱而利其人汗出不止者死有陰無陽故也

此言厥陰熱微者往往驟見陽脫證不可不慎也緣其人

內有久寒故初起不過微熱至六七日一經後正氣不能
與邪氣相支陽外浮則發熱內虛則自利復加汗出不止
則脫矣重在一便字諸虛畢見有飄風驟雨不可當之象
故曰有陰無陽也早用四逆等或者可救

傷寒五六日不結胸腹濡脈虛復厥者不可下之下之亡血
死

此言血虛誤下必死也傷寒厥熱俱微五六日往往有疑
其血結胸而欲行臈中之血者以熱微不退似血熱腹滿
而濡似蓄血脈虛又近於積血之訖也不知血結胸者臈
中氣鬱不舒必腹滿而痛今腹但濡不結胸也脈虛非訖

也此必初起時微熱及熱退而復厥乃陰氣內虛亡血之徵急宜四逆加參治之誤則重傷其陰必死

傷寒發熱而厥七日下利者爲難治

厥熱不宜並見況熱甚而厥至七日則陰自陰陽自陽不相順接可知續又下利其病爲進治熱則妨厥利治厥利則熱愈甚斟酌於淺深進退間豈不難哉

傷寒脈促手足厥逆者可灸之

數時一止爲促此陽盛之脈亦諸陽浮數爲乘府之脈也手足厥逆邪阻厥陰恐轉陷入府無溫經助陽之理當灸厥陰以達之○太陽脈促當涼解厥陰脈促當灸叔和所

謂同脈異經也如上條脈數亦灸厥陰而平脈法云微數之脈慎不可灸讀書者當參觀而自得之

傷寒脈滑而厥者其表

裏一作

有熱白虎湯主之

方見雜療中

傷寒必發熱脈滑爲宿食在胃與表熱相結而氣不宣通故厥若以承氣下之則味過於苦恐脾氣不濡胃氣反厚而成挾熱之利故但以白虎養其津液使大便自暢三焦氣伸而表自解耳此爲伏寒所發裏熱已甚白虎有辛涼化汗之能故表裏可雙解也

手足厥寒脈爲之細絕當歸四逆湯主之

伏寒之毒藏肌膚本由陽明而發於太陽若一停頓則陽

明逆傳三焦復由三焦入厥陰之裏而手足寒矣脈細非必全是血虛總因邪併於榮閉而不通遂致細而欲絕耳血凝脈絕陷入肝藏故須當歸四逆入榮以泄邪也李士材曰四逆者四肢逆冷之省文也凡言四肢乃自指至肘自足至膝之謂其邪爲深凡言手足乃自指至腕自足至踝之謂其邪爲淺曰四肢厥逆曰四逆曰厥曰逆皆重證也曰指頭寒曰手足厥曰手足逆曰手足冷皆輕證也

當歸

桂枝

細辛

芍藥

各三兩

炙草

通草

各二兩 大棗 二十五枚

右以水八升煮取三升去滓溫服一升日三服

此用桂枝湯調和榮衛故君當歸協桂心以入血絡去生
薑無庸洩衛也倍大棗者榮氣出於中焦也木通主通利
血脈關節亦入太陽綱辛幽香以達少陰佐此二味乃入
榮達衛法蓋厥陰病既不能順接於太陽必不能順傳於
少陰今則開太陽而并轉少陰之樞則中間之厥陰直如
前提後挈而無能爲逆矣

若其人有寒當歸四逆加吳茱萸生薑湯主之

吳茱萸

二兩

生薑

八兩

前方中加此二味

右以水酒各四升和煮取三升去滓溫分四服

此承上言之有寒者有寒飲也飲停則懼其下利矣加吳

黃以通上中二焦生薑以宣上焦更藉酒以達周身使水
氣從三焦分布而榮衛調利不作矣

大汗出熱不去拘急四肢疼若下利厥而惡寒四逆湯主之
此病傷於三焦也大汗出者上焦之陽虛熱不去者下焦
之陽浮所以內拘急而四肢疼也三焦逆傳於脾則下利
矣厥陰相應則厥利並見而惡寒矣辨脈法曰陰陽相搏
名曰動陽動則汗出陰動則發熱蓋陽出陰入以關爲界
關脈止得中間一分若關上見數脈無頭尾如豆大厥厥
動搖則上侵寸而陽動下侵尺而陰動故汗出發熱厥利
惡寒齊見溫中焦以達上下二焦非急用四逆湯不可也

大汗出若大下利

懋修案千金作
火下利恐誤

而厥四逆湯主之

若猶或也言或汗或利有一而厥不必兼見已爲三焦之傷當主以四逆矣蓋三焦爲原氣別使傷則厥陰不得中見之化必變純陰無陽證不可不救之於早也

病者手足逆冷脈乍緊者邪結在胸中心下滿而煩飢不能

食病在胸中當吐之宜瓜蒂散

方見療
痞中

不云傷寒云病者兼厥陰中風言也凡厥陰病必消渴温暑病亦多消渴玩乍緊二字則必前脈不緊而今驟與手足厥冷並見故可斷爲飲邪初起而用吐法也

傷寒厥而心下悸先治其水當與茯苓甘草湯却治其厥不

爾其水入胃必利茯苓甘草湯主之

傷寒之厥必防利厥利並作危機伏矣但厥而悸則心下有水氣無疑先治其水卽治厥之法蓋茯苓甘草湯是汗劑水氣從表而達厥自止也

茯苓

桂枝

各二兩

炙草

一兩

生薑

三兩

右以水四升煮取二升去滓溫分三服

柯韻伯曰肺爲水母肺氣不化則水不行茯苓爲化水之品故能清水源得桂薑從心入肺外走肌表而爲汗佐甘草以緩之汗出周身而厥自止水精四布而悸自安矣以之治水卽所以治厥也

傷寒六七日其人大下後脈沈遲手足厥逆下部脈不至咽
喉不利吐膿血洩利不止爲難治麻黃升麻湯主之

此必傷寒之宜下者特誤於大下邪反留滯經絡上行鑱
金而將成肺痿也須急提散出表責效於一炊間遲卽肺
藏受傷爲難治矣喻嘉言曰大下後寸脈沈而遲手足厥
逆明是陽氣陷入陰中所致非卽下焦虛脫之證故雖下
部脈不至泄利不止不得謂爲純陰無陽況咽喉不利吐
膿血又陽邪搏陰上逆之徵仲景特於陰中提出其陽得
汗出而錯雜之邪盡解也

麻黃

去節二兩半

萎蕤

知母

黃芩

各十入銖

升麻

當

歸各一兩芍藥 桂枝 石膏 乾薑 白朮

茯苓 麥冬去心一炙草各六

右以水一斗先煮麻黃二沸去上沫內諸藥煮取三升去

滓分溫三服一炊間當汗出愈

君以麻黃取其捷於得汗也升麻解毒當歸和血故以為

臣然後以知母黃芩清肺熱萎蕤麥冬保肺陰薑甘三白

治瀉利復以桂枝石膏辛涼化汗入榮出衛從肺氣以達

四未紀律森嚴孰識良工心苦哉

傷寒四五日腹中痛若轉氣下趨少腹為欲自利

此下皆言下利也下利必因自利而來故以此節開其端

示人以上工治未病之旨傷寒有一起卽下利者此論因
渴飲之故邪熱與寒水相搏於四五日腹痛若轉氣下趨
少腹則寒氣下行爲欲作自利之常態不可不知也腹中
未嘗無熱因自利而邪下陷變爲下利耳

傷寒本自寒下醫復吐之而寒格更逆吐食入卽出乾薑黃
芩黃連人參湯主之

乾薑

黃芩

黃連

人參

等分

懋修案千金云各三兩

右以水六升煮取二升去滓分溫再服

肘後方以下利色白食不消者爲寒下卽難經大腸泄也
大腸未始無熱病因於寒故名寒下寒格者吐下之藥多

寒格拒邪熱橫阻於中則既吐且下胃不和而中氣日虛
金匱以食已卽吐爲有熱故以苦辛甘並用補而和之亦
彷彿瀉心之義也喻嘉言曰食入卽吐格拒甚矣故用薑
參以溫胃苓連以下逆而裏邪自解

下利有微熱其人渴脈弱者自愈

徐忠可曰下利脈證或有參差而內邪喜於外出則同微
熱是邪欲出表渴是胸中陽勝脈弱則在內之邪氣少雖
不治之邪去正自復故自愈也

下利脈數若微熱汗出者自愈設脈復緊爲未解

徐忠可曰脈數爲陽勝雖有微熱汗出則邪從外洩故亦

自愈設數中見緊則寒邪尙堅爲未解矣

下利手足厥無脈灸之不溫若脈不還反微喘者死少陰負

跌陽者爲順

懋修案千金無若脈不還四字

金匱云六府氣絕於外者手足寒五藏氣絕於內者利不禁故厥利並見爲危機灸之謂灸厥陰之大敦穴也在足大指端少陰跌陽皆在足上張合韶曰下利陽氣下陷也陽陷下而不能橫行手足故厥冷不能充達經脈故無脈灸之則陷下之陽起而橫行充達矣若不溫不還而反微喘下焦之氣不歸元必上脫也愚按少陰負跌陽爲順者言灸後足脈三部其灸處不可診惟診其跌陽先見而少

陰亦副之而出此二脈見則三部齊還而病可生矣

下利脈反浮數尺中自濇其人必清膿血

下利有熱數當見於尺部今寸脈浮數是肺熱也尺中自濇者喻氏謂熱邪不還表而搏結陰分雖寸口得陽脈陰邪仍走下竅可決其必便膿血也

下利清穀不可攻其表汗出必脹滿

成注下利者脾胃虛也胃爲津液主汗亡津液則胃氣愈虛故脹滿徐忠可曰非水非完穀非腸垢但色不黃臭不甚乃瀉而不實者此所謂下利清穀也

下利脈沈弦者下重其脈大者爲未止脈微弱數者爲欲自

止雖發熱不死

喻嘉言曰下利而脈沈弦主裏急後重成滯下證卽所謂痢也脈大卽沈弦中之大脈微弱數卽沈弦中之微弱數脈微弱數雖發熱不死則脈大身熱死可知矣

下利脈沈而遲其人面少赤身有微熱下利清穀必鬱冒汗出而解其人微厥所以然者其面戴陽下虛故也

鬱冒者鬱結而氣不舒昏冒而神不清也戴陽謂虛陽浮於面也程郊倩曰下利脈沈遲爲寒面赤身微熱表陽爲寒所持鬱不得越可知所下者清穀裏寒可知其解必由汗出表鬱故也其汗必先鬱冒寒持故也病人必微厥指

未解前言卽鬱冒中之一證裏寒故厥陽不甚虛故微厥
虛在下而不在上所以成戴陽之狀虛字當作寒字看
下利脈反數而渴者今自愈設不差必清膿血有熱故也

今當作合凡厥陰之轉陽者陽氣雖復若與邪相併於榮
分在上則吐膿血在經則發癰膿今邪乘下利之虛則便
膿血矣以陽氣勝必化熱邪不去亦變熱兩熱相合也此
證或用微涼或用疏導無不愈者惟不可誤用辛熱耳仲
景著便膿血無死候說見王氏準繩中

下利後脈絕手足厥暍時脈還手足溫者生不還者死

暍時周時也用利後

懋修案用字
恐下字之誤

津液已竭先脈絕而厥

冷則由少陰傳厥陰陰陽並虛竭此不可灸也特以證屬傷寒非久病比或徐俟其脈還手足溫庶可因脈以處方耳

下利清穀裏寒外熱汗出而厥通脈四逆湯主之

脾胃虛寒逼陽外越用四逆宜矣加蔥白者升陽以治其利又引入陽明以達四末而治其厥蔥雖發表有薑附之大力可以守中也於以知下利清穀之不可攻表者指桂枝湯言之而通脈四逆不在此例也

熱利下重白頭翁湯主之

懋修案千金於此條下又另有一條云下利欲飲水者爲有熱白頭

翁湯

主之

白頭翁

二兩

黃蘗

黃連

秦皮

各三兩

右以水七升煮取二升去滓溫服一升不差更服

此厥陰熱利治法也云熱利則有煩渴等證可知云重下則溼熱之濁注於肛門可知厥陰主藏血溼熱着於血分故以連蘗之苦能入血者清之而君以白頭翁取其性升可散相火之鬱佐以秦皮又取其專入厥陰而清熱也熱淫於內以苦發之蓋非徒以苦堅之也

下利腹滿身體疼痛先溫其裏乃攻其表溫裏宜四逆湯攻表宜桂枝湯

下利不後重而腹滿非熱利矣此裏寒也身雖疼痛宜先

以四逆溫之乃可用桂枝小和之也

下利而譫語爲有燥屎小承氣湯主之

下利則胃津已傷加以熱邪鑠之而作譫語其有燥屎可知主之以小承氣不用芒硝恐傷厥陰血分也

下利後更煩按其心下濡者爲虛煩也梔子湯主之

喻嘉言曰已利而更煩似邪未解然心下濡而不滿則煩爲虛與陽明誤下胃虛膈熱證頗同故俱用涌法

嘔家有癰膿不可治嘔膿盡自愈

此下皆論嘔也嘔不必屬厥陰此因厥陰相火衝入胃中

胃腕有癰膿成作嘔是雖胃病而實厥陰經脈之熱邪爲

病也凡陽明府病多不死故云膿盡自愈其不治嘔者喻

嘉言謂恐人誤以茱萸湯治之耳識此意者用辛涼以開

其膿可也

嘔而發熱小柴胡湯主之

懋修案千金於此條下另有云乾嘔吐涎沫而復頭痛吳茱萸湯主

條之

此發厥陰而溜於少陽者也嘔病尙在半表半裏發熱則

病機轉從半表而出矣以小柴胡和之自愈

嘔而脈弱小便復利身有微熱見厥難治四逆湯主之

程郊倩曰嘔而脈弱厥陰虛也小便復利少陰寒也上不

納下不固陽衰可知微熱見厥更慮陽為寒逼而欲越故

難治此從少陰移來故用四逆從少陰治

傷寒大吐下之極虛復極汗者其人外氣怫鬱復與之水以發其汗因得噦所以然者胃中寒冷故也

此與下節皆論噦而附於厥陰者以熱邪深入未有不屬厥陰也外氣怫鬱原有伏熱在胃復爲水寒相搏陳延之所謂變成壯熱大哕者噦之得蓋因乎此此當用瀉心湯法及外臺祕要噦方如梓皮湯茅根橘皮湯無泥於胃中寒冷四字專仗丁香薑附也

傷寒噦而腹滿者視其前後知何部不利利之則愈

上言胃寒成噦此則實熱之噦也有腹滿一證可據審爲

飲積之熱以猪苓湯利之食積之熱以承氣利之則愈矣
按噦與今所謂冷呃相似但微兼乾嘔意比冷呃之聲促
稍長耳蓋冷呃者簡也非噦仲景以虛者爲簡實者爲噦
不可不辨簡爲虛證可溫納噦則虛中藏實之證王海藏
曰大抵皆因失下生仲景之言不虛僞便軟惟宜用瀉心
便鞭惟宜大承氣與此二條適合

門下晚學生馮汝玖校字